

## BERTSO BERRIAK

*Jesux Mari Irazu*

### Erreskateari jarriak



XDZ

#### I

Espainiak berezko  
ohi du Handigintza  
Felipe bigarrena  
halaxe zen mintza  
Lehen inperioan  
beti argi printza  
eguzkirik sartzen ez  
zeneko oroitza  
orain ateratzeko  
lotsetan dabilta.

#### III

Paradisu fiskalak  
palmondo, kokoak  
ta kokotza tapaki  
gehienen kolkoak  
Salbatu bankuak ta  
gero gerokoak  
Noeren txalupara  
poltsa berokoak  
bizitza bera baino  
lehenagokoak...

#### V

Antonio hizketan  
gizon kaskailua  
pozik, aurkitu baitu  
bere jostailua  
Nahiz alde izan lege,  
toga ta mailua  
Hemen denok daukagu  
geure gordailua  
memori pixka bat ta  
kalkulagailua.

#### II

Ehun mila milioi euro...  
beste hainbeste bela  
Zazpitik lau probintzi  
bustiz mela-mela  
Erreskate, mailegu,  
edo dena dela  
Nik uste ia-ia  
esan litekeela  
jada, Espainia ez  
Europa gara.

#### IV

Sufragioa ere  
omen mailegu gai  
boto erreskatea  
hauteskunderen zai  
Lehen berrehun mila pasa  
mapatik kendu ai  
orain hirurehun mila  
zorretan hartu nahi  
Geltoki intermodala  
beharko dugu bai.

#### VI

Azken ale bat bada  
utzi nahi dudana  
eskola txikitako  
bizitza emana.  
Mende laurden luzean  
su bajuko lana  
emaitza, benetako  
erreskate plana  
eginaren aitortza  
zorretan daukana.

**DOINUA:** Agur sagar belatzaran.



Bidali zure sortak [bertsoak@argia.com](mailto:bertsoak@argia.com) helbidera. Aukeratuak orri honetan argitaratuko ditugu.